




Senin, 18 Oktober 2021

Siman Ogen: Masmur 139: 16



Itandaindu Aku



Syair ende-enden si lanai asing man banta, erpalasken Masmur 139 enda "Jahwe si pepayo aku, tandaiNdu aku tehNdu aku kundul ntah tedis, janah sura-surangku iangka Kam idauh-dauh nari.....rst" adina si endeken alu mereken penghayaten kempak ende-enden e situhuna megegeh kal nge kita, lanai aru ateta sabap kegeluhenta enda tahu-tuhu i teruh pengaturen Dibata. Katawari kita tubuh, kesempatan-kesempatan si banci ialoken kita asum kita nggeluh, tantangan kai si bakal ialaken kita, ijapa pe kita, paksa erkai pe kita, kai si jadi ukurenta, kai sura-suranta la lit si terligen i bas IA nari. Tangkas i bas Dibata dengen kita paksana ianena (ibentukna) bagi singena ate Dibata.

Daud si nuliskan kerna masmur enda nuriken kerna Dibata si isembahna e tahu-tuhu Dibata si erkuasa, ngelebihi sesembahen/gana-gana si isembah Bangsa Israel si la tek man Dibata asum jaman si e. Daud ersura mereken persinget maka gana-gana sesembahen e labo meteh uga situasi manusia, sabap ia labo erkusa. Guna si e me maka masmur enda sifatna penegasan nuriken Dibata Israel si layak isembah. Tole isuratken Daud, ope denga aku tubuh pe enggo itandaiNdu aku, kerina wari kegeluhenku pe enggo isuratken i bas kitabNdu ope ibenaken pe wari-wari e. Ertina Moria, kita enda kerina labo lit tubuh ku doni enda secara kebetulan, entah pe la erguna i bas doni enda. Kerina kita enda enggo irencanakan Dibata guna tubuh ku doni enda, guna ndahiken dahin si mehuli i bas kegeluhenta. Payo la banci lang kita ngalaken tantangan, tapi labo e erbanca kita erndeale ate.

Perbeben dengen kiniseran geluh mekatep erbanca kita nggejapken ntah lanai iperdiateken Dibata kita, sisada kal kita ndalani wari kegeluhenta, entah teman-temanta e pe lanai mperdiateken kita. Bage gia, ola kitik ukurta sabap Dibata tetap setia i bas kegeluhenta si tek man baNa.